
P r a e f a t i o.

Quod veritatis historicae amor, carae patriae dilectio, et almae universitatis nostrae studium bonis avibus suscepit, industria constans liberalitate comite eo promovit, ut monumentorum historicorum academiae nostrae tomi secundi primam partem jam publici fecerit juris.

Grato potissimum celebramus animo munificam reverendissimi ac celsissimi principis archiepiscopi Pragensis Aloysii Josephi comitis Krakowsky de Kolowrat

VIII

conatus nostri approbationem, qua tomi hujus sibi grate consentienti dicandi editionem die 4. m. Januarii a. 1833. benigno praesidio adjuvit. Fatis vero, quod sane dolendum, die 28. m. Martii e. a. concedens ordinem philosophicum publica gratiae pietatis significatione, qua vivens gauderet, orbavit. Qui praeterea huic incepto sumtibus prospexerunt, in tomi hujus fine recensebuntur.

Continet autem haec prior tomi secundi pars antiquissimum juridici ordinis album magna ex parte levi manu conscribillatum, aevoque obsoletum, omnium proinde ejus temporis chirographorum lectu sane difficillimum, atque adeo opera nostra haud dubie dignissimum, utpote quod universitatis juristarum rectores (siquidem decretorum legumque doctores et studiosi tunc peculiarem universitatem efficere sibi visi sunt) ejusque sodales do-

centes, doctos atque discentes ab ao. 1372. usque ad a. 1418. exhibet, quorum plurimi, aut in artium facultate jam antea clari, aut in historiae patriae paginis celebrati, tanquam vetuli notique amici, grate nobis occurrunt. Accedunt notae statum oeconomicum attinentes, et in fine etiam vita functos ad annum usque 1390. consignatos legimus, spatii termino plures notare vetante. Ut vero ad singulos accessus pateat commodior, nomenclaturam, ut in tomo priori, cunctorum, quotquot in hoc albo occurrunt, virorum alphabetice digestam adjecimus, antiquo facultatis artium albo jam insertis asterisco notatis. Quantum inde luminis viris scientia claris, quantum certitudinis rebus in scientiarum et artium palaestra gestis, sacris atque profanis, accedat, quilibet prudens et aequus hujus thesauri in lucem prolati arbiter nobiscum aequo profitebitur,

ac plures rerum Bohemicarum scrutatores jam publice professi sunt.

Hanc juridicae facultatis matriculam pvimaevam sequitur universitatis nostrae codex diplomaticus literarum monumenta complectens, quibus studii generalis Pragae non solum origo, incrementa, jura, privilegia, beneficia et alia fata secunda et sinistra exponuntur, sed et aetatis illius, et virorum in ea partem habentium ingenium, actionumque fontes ac fines radiis illustrantur, quibus omnis alia rei literariae repraesentatio historica careat necesse est. Materias hujus codicis in duas sectiones dispescere placuit, quarum prior scripta authentica in universitatis tabulario adservata, altera tabulas aliis e grammatophylaciis depromtas et in unum collectas complectitur. His quoque index nominum rerumque indaginem reddens faciliorem in altera hujus tomi parte adjungetur.

Ceterum eandem orthographiae legem sumus secuti, quam in tomo primo servavimus, et cujus rationes ibidem in praefatione aperuimus. Hae tabulae publicae, quarum plurimae e literis authenticis, pauca e fide dignis exemplaribus religiose transsumtae sunt, praecipua status universitatis momenta ab origine prima revelant, et ita revelant, ut arbitrariis, in rebus academiae nostrae exponendis, uti commentis, Caroli nostri, cujus beneficiis omne in aevum grata patria nostra gloriabitur, factorum, rerumque Bohemicarum detractoribus in posterum integrum non sit.

Operam itaque nostram in his chirographis non solum e tabulariorum, sed et scripturae lectu perdifficilis claustro protrahendis, eruderandis, atque coaevis posterisque in usum aequae commodum ac certum offerendis collocatam omnino su-

pervacaneam non censebunt, qui prima
rei gestae repraesentatione minime ac-
quiescentes rerum fontes testiumque fidem
perquirunt.

Pragae 1834.
